

定山堂詩集

序

大宗伯合肥龔先生哀  
其新舊所著詩郵授其  
友婁東吳偉業曰僕少

託吟咏不計工拙惟求  
適情積之數十年遂盈  
卷軸然而賦才凡穢局  
體卑庸井蛙夏蟲難語

寥廓也久矣夫不經匠  
石之門者不登榱桷子  
其爲我芟削之偉業伏  
而讀仰而思曰夫詩人

之爲道不徒以其才也  
有性情焉有學識焉其  
淺深正變之故不於斯  
三者考之不足以言詩

之大也。今以吾龔先生  
選詞之縟麗、使事之精  
切、遣調之雋逸、取意之  
超詣、其詩之工固已俊

鵠之舉也扶搖一擊騏  
驎之奔也決驟千里先  
生之潛搜冥索出政事  
鞅掌之餘高咏長吟在

賓客填咽之際嘗爲余  
張樂置飲授簡各賦一  
章歌舞恢笑方雜沓於  
前而先生涉筆已得數



紙坐者未散傳誦者早  
遍於遠近矣此先生之  
才也身爲三公而修布  
衣之節交盡王侯而好

山澤之游故人老宿殷  
勤贈答北門之窶貧行  
道之饑渴未嘗不徬徨  
而慰勞也後生英雋弘

獎風流考槃之寤歌形  
管之悅懌未嘗不流連  
而獎許也自伐木之道  
衰而黽勉有無匍匐急

難者吾不得而見之矣  
先生傾囊橐以恤窮交  
出氣力以援知己其惻  
怛真摯見之篇什者百

世而下讀之應爲感動  
而况於身受之者乎此  
先生之性情也板蕩極  
而楚騷乃興正始存而

大雅復作以先生時世  
論之繇其前則愾我寤  
歎憂讒慝痛淪胥也繇  
其後則式燕以敖誦萬

年洽四國也舉申旦不  
寐之衷與夙夜在公之  
道上求之於古昔內審  
之於平生於是運會之

升降人事之變遷物候  
之暄涼世途之得失盡  
取之以融釋其心神而  
磨淬其術業故其爲詩



也有感時侘傺之響而  
不改於和平有鋪揚鴻  
藻之辭而無心於靡麗  
秦風之篇曰蒹葭蒼蒼

白露爲霜士君子所以  
久而益堅者其砥礪必  
有道矣此先生之學識  
也余定交於先生者三

十五年凡友朋之稱詩  
者以百數舉其最曰海  
虞錢宗伯牧齋萊陽宋  
少司寇九青九青鎖闥

論文江行紀勝與吾輩

三人同事於楚而牧齋

晚年不自得適會先生

謁告南還相與淋漓傾

倒於白門金昌之間斯  
二者相知爲深九青好  
矜慎其詩嘗追擬少陵  
頗能得其一二日必課

五言一首，異其學大有  
成就，始肯出以示人。迺  
不幸而以兵沒，雖其斷  
篇零落，百不一存。余每

與先生言而傷之牧齋  
深心學杜晚更放而之  
於香山劔南其投老諸  
什爲尤工旣手輯其全

集又出餘力以博綜二  
百餘年之作其推揚幽  
隱爲太過而矯時救俗  
以至排詆三四鉅公卽



其中未必自許爲定論  
也誠有見於後人之駁  
難必起而吾以議論與  
之上下庶幾疑信往復

同敝天壤而牧齋之於  
詩也可以百世然後知  
昔人之詩其作之者傳  
論之者亦傳至磨滅如

九青雖相知有吾兩人  
無可加其稱述惟爲之  
撫卷追歎而已余忝少  
長於先生旣推服其才

又熟於性情學識之有  
素故於論詩表而著之  
嗟乎先生之功於斯世  
甚大固無藉於詩以傳

而詩之工已臻於至極  
余衰且憊庶幾廁名集  
中隨諸子之後他日有  
追數其交遊而及之者

此余所以三復不器

而序之之意也不然余  
之言豈足爲先生重哉  
康熙九年歲次庚戌季

夏婁東弟吳偉業頓

首拜撰

序

古來名世挺生莫不道岸  
弘通義山聳拔而又加以  
博綜濬厥靈心乃能以大  
經濟之宏材樹真風雅之



赤幟是以卷阿作賦鳳翥  
諧音吉甫陳詩清風肆好  
希文懋德廼傳遠帆芳草  
之篇平仲膚公不乏斜日  
孤邨之句然而一言居勝

輒寶懸黎四韻纔成便高  
洛價求其披衷奮腕風雨  
爭飛口含手裁精光四射  
旣工且敏蓋亦鮮矣芝麓  
龔先生曠世逸才挾天鴻

藻語其道義則鶴情瀟灑  
聳中散之百尋龍德沉潛  
貯黃生之千頃孤寒之士  
望影知歸鉛槧之徒聞風  
借蔭良有以也語其博綜

則津逮靈文咸藏腹笥謨  
觴秘笈盡載行廚執經問  
難戴憑之席五十重博物  
洽聞張華之書三十乘惟  
其有之是以似之矣語其

經濟更軼尋常昔號敢言  
披龍鱗而不讐今恢大略  
附鳳翼以彌高長棲烏之  
府獨座風生坐司馬之堂  
六師雷奮更復明刑弼教

法劑重輕典禮秩宗寅惟  
夙夜趙衰之日淑氣覃敷  
傅說之霖繁陰將合矣乃  
爾偶因清夜和陶令之芳  
辭或感閒居步嗣宗之遺

響唱予和汝言宛轉而常  
新對物懷人心牢騷而獨  
寫無不洋洋纒纒情瀾生  
睢渙之文秩秩悒悒菰圃  
發江山之秘迨其南皮偶

集西第弘開座上之客皆  
是應劉方外之群或逢支  
許因而拈題分韻卽事徵  
詩人方腐筆含毫揆枯槁  
胃而先生思如泉涌舌有



蘭芬始陳方絮已獲驪珠  
纔命青鏤輒先拱壁漫言  
倚馬刻燭卽是千言共羨  
雕龍粲花動盈三篋豈非  
賦于天者獨異積于中者

不窮乎人亦有言一人之  
思遲速天懸一家之文工  
拙壤隔是以二十四詩品  
各擅所長千百有餘年指  
不數屈而先生衆美畢收

群芳俱擷千門萬戶合成  
建章之宮五岳三峰獨踞  
蓬壺之上艷冶如春風而  
未嘗無明月弄身人澹如  
菊之雅致感慨如秋籟而

未嘗無金樽伴客賞雨茆  
屋之風流高古如鐘彝而  
未嘗無桺陰路曲流鶯比  
鄰之柔聲圓轉如彈丸而  
未嘗無返虛入渾積健爲

雄之大力硯橫河漢挹東  
瀼而拍西崑紙落烟波挾  
瑯琊而超歷下以茲樹幟  
不亦偉歟抑聞之言爲心  
聲詩有爲作先生一卷之

中多懷古昔數和之調每  
係故交接笑語者半鯁冠  
秫縫之儒經品題者或釣  
瀨耕巖之侶舉世指爲膺  
門萬戶祝其鄧袞此豈區

區以風雅鳴者所能項背  
耶予以標末之姿竊附燥  
溼之後而先生不遺葑菲  
曲藉蘭茝今集中所載爲  
僕所作私幸居多皆寫自

中心不翅口出肝膈吐于  
毫端苾芬騰于紙上由今  
追昔以古準今所稱道岸  
弘通義山聳拔非先生其  
誰歸乎至于依永和聲詩



詞相禪而引商刻羽宮調  
久疎先生偶一拈提輒居  
最上青蓮才富更傳殘照  
西風坡老名高亦譜輕涼  
玉枕卽如兒子在浚所刻

秋水軒唱和諸閔韻險而  
句彌工和多而調愈穩上  
林三月無非睨睨之音大  
谷千谿盡叶笙鏞之韻攬  
其全鼎足了十人入廣野

之嶽舉步寶闕瓊樓授蒼  
使之書觸目琅文琳篆此  
又元白諸公所未窺之閫  
輿而周秦諸子不易測其  
津涯者也余於梅村先生

所幸讀全稿譬

指樓閣重

色變現予不能盡知先生  
而不敢不以壇坫尊先生  
也爰爲弁首用識同心云

耳

康熙壬子年端陽月櫟下  
年家眷同學弟周亮工  
拜撰

舊序

虞山錢謙益

記曰人生而靜天之性也感于物而動性之欲也性不能以無感感不能以無欲物與性相摩感與欲相盪四輪三劫促迫于外七情八苦煎煮于內身世軋戛心口交蹢萌于志發于氣衝擊于音聲而詩興焉故曰詩言志歌永言長言之不足則嗟嘆之嗟嘆之不足則詠歌之嗚其趣極其致可以哀樂而樂哀窮通而通窮死生而生死性情之變

窮而詩之道盡矣。今之論詩者，剗度格調，剗鉢肌理，奇神幽鬼，旁行側出，而不知原本性情。言古詩，則曰十九首，亦知其驚心動魄，一字千金者乎？言今體，則曰杜陵，亦知其語必驚人，餘波綺麗者乎？義山之隋宮、馬嵬、長吉之銅仙、遼海、長慶之長恨、諷諭一言半句，色飛灰死，連章累什，心折骨驚，有能唱嘆嗟咀，深知其旨意者乎？有人曰：真詩乃在民間，文人學士之詩非詩也。斯言也，竊性情之似，而大謬不然。夫詩之爲道，性情學問叅會者也。性

情者學問之精神也學問者性情之孚尹也春女  
哀秋士悲物化而情麗者譬諸春蠶吐絲夏蟲蝕  
字文人學士之詞章役使百靈感動神鬼則帝珠  
之寶網雲漢之文章也執性情而棄學問採風謠  
而遺著作輿謳巷謔皆被管絃掛枝打棗咸播郊  
廟胥天下用妄失學爲有目無覩之徒者必此言  
也吾友孝升今世吟壇之渠帥也當其標舉興會  
籠挫今古淵文綺合慧辨連環夜光之珠狼籍道  
路崑山之人直用以抵鶻耳至于朦朧萌折憤盈



偏塞詠汾水秋風之什聽江南紅豆之歌一語神傷四座泣下雖作者亦不知其有使然也故吾斷以孝升之詩爲文人學士緣情綺靡之真詩性情學問化工陶冶可以療舉世之詩病不獨專門名家而已余不能詩而能採詩孝升之集行矣余得而敘之余讀內書忉利天殿南有波質拘耆羅樹寶華四照其香逆風行聞二千里竊以爲孝升之詩約畧似之世人讀孝升詩如忉利樹華時諸天共坐其下聞香歡樂樹高四千里枝葉分布二千

里則共坐聞香者或未悉知也余何足以知孝升之詩今得共坐樹下爲聞香歡樂之一人則亦有厚幸矣夫

虞山錢謙益

讀孝升先生過嶺集者咸以韓蘇二公爲比余攷其時世叅而論之則固有不盡同者今夫韓之於潮蘇之於儋皆以貶謫行衰病入瀧負擔渡海鱷魚之與侶而枕櫂之與居皆不勝旅人遷客放流憔悴之苦孝升之過嶺也奉尺一之詔持英觴之

節州邑長吏負弩矢前驅元戎連帥韎首犇袴倪  
立道左龍戶扶旌馬人俠轂此孝升之所有而韓  
蘇之所無也越三湘度五嶺天水相圍颶風撞掣  
扶胥黃木近指一髮蓋海旌幢連天觀閣占規外  
星辰之磊落食章舉夾柱之瑰異此古今之所同  
而韓蘇與孝升之所偕有也韓子之詩莫奇於灋  
吏南食諸篇蘇子海南諸篇子由謂馳騁從之常  
出其後孝升過嶺之詩亦然學富則使物皆靈才  
老則攬境卽變山鴈水屈則昌黎闢其界兀天容

海色則眉山並其澄閒、此孝升與韓蘇之所同、而世之騷人詞客刻畫盡氣、不能追步其後塵者也、然而有大不同者、蘇子渡海、在遲暮累躓之後、和陶之詩、思以桑榆末景、自託於淵明、去買田陽羨、蓋無幾矣、韓子贈元協律、自謂不知四罪地、豈有再起辰、潮州謝上之表、至以封禪告成爲勸、蓋其憂患熏心、生平用壯邁往之氣、僅有存者、若吾孝升、以地負海涵之才、當日升川至之候、風雨發於行間、雲物生于宇裏、輶軒弔古、輶車覽勝、燈炮酒

闌筆酣墨飽、乾端坤倪、軒豁呈露、穹龜長魚、踴躍  
後先、南海之百靈、祕怪恍忽、涌現於篇什之中、蓋  
韓蘇之所乘者、暮氣也、孝升之所乘者、朝氣也、韓  
蘇崦嵫濛汜之日也、而孝升扶桑禺中之日也、才  
有壯老節、有盈縮、而詩之意、匠聲律、從之、蓋有使  
之然者也、後之君子、讀過嶺之詩、比量古今同異  
之間、深思而自得之、無以易吾言矣、孝升使事畢、  
枉道曹溪、致瓣香于慈大師、肉身賦詩、飯依願與  
子瞻同結南華之緣、而深以退之留衣大顛終老

倔強爲可恨張燕公有言願寄無礙香隨心到南海余與孝升心期在是他時志曹溪者將有徵焉而茲固未能備也

虞山

合肥二先生同爲文苑主持  
同位至大宗伯而一逝于  
前一逝于後言念二序爲  
之輟翰不忍多讀也

後學吳興祚識

## 西洛王 鐸

天下事不能兩工工於強立其于詩亦覺平不痺其節也僅見淝水龔太常孝升先生先生當爲給諫觸高壙犯人大忌錚錚爲國家廓清之其擔荷重遠求爲君子之無醜焉耳及見其詩溫然不撓靈光大力不爭小智之所務深乎幽微所以成勝則不言之言非欺先生讀禮後渡江北上仕進不無坎壈先生無枝干中氣靜而安於所是故其詩日殊瑰而逾沉鍊溫厚凝澹不形又不疑戰于時

習令節之痺也。然則詩道中亦往往見廓清之功焉。蓋先生爲諫爲詩，直骨虛亮，以其餘磨毫躋札，猶足以鞭擊弱伍，噫，天下事又有兩工如龔先生者乎？取重遠以無醜，豈不戛戛乎稱難也哉！夫先生非氣靜安于所則已，靜則藏溫厚，則返樸，將來立朝磊砢，欲先生損堯舜孔孟之道，緇不言之言，自痺其節也。予知必悲心愁身殘苟而不肯爲矣。若他人不能堅，且自破，先無其所以爲勝，詩靡弱，餒氣仍負強立，幾何不卽于矯也歟。



吉水李元鼎

今天下靡不知有芝麓先生其願交先生讀其詩而序之以傳者幾徧寓內余固非能知詩者卽疇昔追隨交戟之下瀝肝腸而共晨夕相與閱歷否泰升沉之會揚扆古今治亂之際亦未嘗數數與先生言詩茲何以覩尊拙集而愾然重有所感也余老矣回憶三十年中風雨晦明出處離合當患難時幾不知身世置于何所而猶得徜徉于山巔水涯雲烟雕隔寤寐匪遙不能不動念于先生之

至情有以中于人者深也夫情不至者必不可爲  
詩亦必不能爲必傳之詩古三百篇皆忠臣孝子  
勞人羈士感憤而作其爲性情殆何如耶試取先  
生之詩讀之道照機先思超繫表于君臣父子夫  
婦朋友間見其纏綿篤摯一篇有之一句有之一  
字有之根柢性情觸景成詠真可頡頏古人今先  
生且躡夔龍之武紀太常之績鳴簫韶而矢卷阿  
郊廟讌享贈答賡和颯颯乎盛世之音矣又寧知  
當日淒惋淋漓有如斯者乎嗟乎讀少陵詩不在

入夔以後讀子瞻詩求之過嶺以前則讀先生之詩而不于世變江河運會轉移之際遇非屈宋交非蘇李但覺有溫厚和平之氣而不深維其用意之誠何以知其人而論其世哉王子青蓮介胄而敦詩書且能服膺先生與陳子伯璣取尊拙堂集續梓西江夫亦使學士大夫以及窮山僻谷從事聲歌者知詩派依然山谷瓣香猶在南豐庶足以窺先生之大而增匡山蠡水之高深然才如先生頃刻千萬言又將與日俱新茲豈足盡先生之詩

而先生固不盡于詩也

吳門葉 襄

廬江孝升龔公有詩千餘首集成屬襄序其簡末序曰蓋聞上古之世君明臣良庶譌作焉三代之隆頌聲不廢于以宣金石被管絃來遊來訶何其甚也及周之衰王道廢缺而變風變雅之音出傷州政之苛哀人倫之廢幽憂吁鬱君子讀其詩未嘗不心傷之自茲以降治亂迭更然而賢人君子感時憫事和平淡漠之聲寡而諷歎勞苦之什比

比而是蓋政之衰也久矣夫人有喜怒哀樂之情於是乎有獻歌吟詠之作當歡不能使之悲當戚不能使之豫是故絲竹雜陳尊壘交錯秦青在前韓娥在後衆人爲之低靡而憂傷之士或慨然而思悵焉而增其不樂情動于中氣鬱于外也又况臨高山涉大河故國舊都望遠傷懷者乎故曰詩言志歌永言又曰誦其詩讀其書是以論其世也公未弱冠以進士高第出宰百里治行冠循吏摧給事中慨然以天下爲已任顧世方亂盜賊蜂起

伊洛秦晉楚蜀之地、破軍殺將、攻城掠邑、所在見告、朝廷方憂勤旰食、而僉邪亂政、朋黨交煽、公抗疏力爭、遂下詔獄、信而見疑、忠而被謗、卒之國事亦與俱敝、故其詩多憂讒畏譏、呼天念亂之作、繼遭變革、駿已顯用、而懷古慮舊、惻怛忠厚之志、猶時時見于篇帙、今取而讀之、艷而不靡、哀而不傷、憂深思遠、有陳思嗣宗、子山少陵之遺焉、近世以來、海內人士、咸慕聲律、求其掩薄風騷、牢籠今古、大者千言、小或數百、備興衰、正得失、昭示來世、則

公其人乎、或謂以公之才、遭逢盛世、宜乎發揚蹈厲、嗣明堂之歌、賡郊廟之頌、黼黻治化、成一代雅樂、顧乃咨嗟太息、有勞人羈士、勤苦憔悴之思、足奚爲者、嗟乎、是則公之所爲志也、百世而下、有誦公之篇章、而相與論其世者、庶幾以予爲知言矣夫

黃岡杜潛

嶺南山水奇絕、顧在唐宋、嘗爲遷謫之藪、其間英人魁士、指不勝屈、吾獨竊怪其能以篇章發洩山

水之奇者何其少也。卽古今雄伯如昌黎子瞻久  
於其地。嘗有高文。然無關山水。而昌黎奇句自有  
海無天地而外。惟多怨曠之詞。極言其地之苦惡。  
使山水蒙詆。茲非其不幸歟。今孝升先生往返其  
境。爲時僅以數月計。而其爲詩之多。遂溢至三百  
餘首。剴刻鎔鑄。精渺而深華。遂能使足目所經。萬  
里羅于尺幅。而先生之詩。向之以絕麗稱者。亦於  
是乎一變。吾讀十八灘諸什。怖焉。此猶永嘉之有  
謝夔門之有杜昌黎。子瞻視之。缺如矣。是豈獨其



才勝哉蓋其胸中灑然有過於古人者也吾故樂爲序之使後世知先生有此實可謂至幸而又以慰嶺南山水從來之不幸也

下邳余懷

粵自卿雲始唱黃竹摘辭則聲音之源均乎太古洎夏歌鬱陶楚謠侘傺而哀怨之作漸積彌工大風瓠子落葉哀蟬蟬緩帝庭瀾淪史冊至於蘇李寫抱於河梁曹王託懷于鸞馬雖興會于一時亦雅流之傑製也晉宋以降風藻愈繁大抵世治則

和平之韻多世亂則激騷之體出使蘭成虎視於  
六代杜子美龍躍於三唐跡其生平皆以遭亂坎  
壈失職悲傷去國離鄉展轉顛顛登山臨水送客  
將歸揚其幽憂之思發爲溜瀉之響使二公者遭  
逢盛代高議雲臺或富寵終身思流奕葉豈能推  
厲風騷振蹕篇什乎故知雨露者天所以參庸俗  
冰霜者天所以練英雄易著元亨利貞貞下又以  
起元詩稱興觀羣怨怨極乃能復興斯理數之恒  
情抑古今之大畧也僕本恨人伏膺墳籍賦迨枯

樹殫平生蕭瑟之才、堂擬浣花、竭沉鬱頓挫之力、  
而扛鼎恒虞絕續、衝濤又以鼎臆、卽顧盼江湖、肝  
衡藝苑、誰云承蓋、未敢扶輪、維我芝麓先生、允稱  
哲匠、其爲兼擅、夫可得言、蓋云絕學性成、吐詞天  
拔、挾雕吐鳳、扶月攄虹、始乎製錦、迄於伏蒲、家裝  
玳瑁之書、人架珊瑚之筆、倚蘭香草、旣揆春華、古  
日車攻、復傳秋實、神來興集、遊矯靈仙、雍容觴瑟  
之間、縱橫盾墨之表、其爲詩也、蹈厲而發揚、冲融  
而冥憂、爰自化離中、嬰憂患、拜西川之杜鵑、唱江

南之紅豆、出盧龍之塞、倚代馬而長吟、閉銅駝之街、掇彩毫而驚夢、景純雋上、越石清剛、玉椀含光、斑篁佇熾、夢西京之臺沼、想故山之風月、其爲詩也、纏綿而悱惻、采烈而興高、迄於壯歲、駕言遠遊、闕金粉於重闈、躡珠履於上座、金城楊柳、旣攀條而泫然、庾嶺梅花、更巡簷而索笑、以至江雲、江雨、山鳥、山蟬、芝蓋、春旗、桂林、秋井、霰零、灞岸、木脫、洞庭、莫不傷茲客心、鋪其麗藻、清文滿篋、聲搖長樂之鐘、新製連篇、色褰蜀江之錦、其爲詩也、軼宕而

多傷感慨而蘊藉大抵人患才少公患才多人苦  
腸枯公苦腸熱人見公之攬轡至朝得時行志而  
孰知公之悲天憫人憂讒畏譏一篇之中三致意  
焉其用意如此之深乎義城少陵得公而三笑顏  
謝爲未工嗤潘陸其已拙蓋六藝之笙簧四始之  
肴饌也公才十倍于僕謬以僕爲羽旗僕也何敢  
望公輒奉公之壇坫雖公之愛僕衣江春海日之  
詩而僕之推公有天下英雄之目豈徒虛加獎飾  
就傳玩於玉枕好是詞章延諷詠於洞簫而已哉

是集也行於海寓稱文章之伯播諸來襍得江山  
之助若畧其肆應之篇特抽杼軸之美雖仲尼復  
生采刪風雅亦當被之管絃陳諸郊廟者矣

小序

古之詩教嘗在上。皐陶賡歌  
詩之始也。及周而盛。元公首  
陳。豳風下逮。召康公穆公衛  
武公尹吉甫凡伯仍叔之徒。  
斐然有作。號為大雅。至於黍

離降為國風，乃有勞臣隱士  
征夫怨婦之辭，而詩教於是  
乎衰矣。漢之盛也，柏梁之體  
暢於枚馬；唐之盛也，開元之  
風發於燕許。其後才人不遇，  
栖遲草澤，相為幽愁慷慨之



音以自鳴其不平而論者遂  
有詩能窮人之說嗚呼此豈  
詩之故哉言詩於今日可謂  
盛矣余觀

朝廷之上公卿大夫率多光明  
俊偉喜爲文章以表見於世

而一時騷人墨客承風附景、  
步趨恐後、此詩教在上之應  
也、於我江南則合肥龔公為  
最著、公以詩名者三十餘年、  
其體裁不一、要而論之上者  
比於采薇、天保、次亦如白麟、

赤雁芝房寶鼎之篇班固所  
云或以抒下情而通諷諭或  
以宣上德而盡忠孝雍容揄  
揚雅頌之亞也且公今官大  
宗伯周禮之官之屬太師教  
六詩曰風曰賦曰比曰興曰

雅曰頌以六德為之本以六律為之音詩之所至樂亦至焉樂正而禮治禮樂明備王道成矣然則公所以佐

天子率百職治神人和上下皆於詩乎取之豈僅與騷人墨

客尋聲摘韻者較其毫釐分  
寸乎哉嗟乎當夫詩之盛於  
下也布衣諸生旗亭唱和往  
往流傳於宮禁鬻寫於臺閣  
內而宰相外而藩鎮徵辟延  
攬常若不及其意氣傲睨亦

足以豪矣。若今日者，詩教上行，得龔公十數人，落然參錯廟堂，為詞壇領袖，即有才如李杜，不過應教門下，歛衽稱述已耳。安能揚眉吐舌，以長城自雄哉！此又余之所深

感也、因流詠不輟而為之序、  
康熙癸丑十月既望吳門後  
學尤侗拜謨

五言古

二卷

二百首

七言古

二卷

七十二首

五言律

十一卷

一千一百五十七首

七言律

十七卷

一千六百五十六首

五言排

一卷

二十六首

七言排

一卷

六首

六言絕

一卷

十九首

七言絕

八卷

八百廿九首

共計四十三卷 三千九百六十五首



定山堂詩集卷一

五言古詩一  
一百三十二首

送雪堂夫子南歸用古詩十九首韻

送遂初朱子南歸和蘇李錄別韻  
七首

花朝同敬哉韞退玉叔爾唯舒章芥菴社集

秋岳齋限韻十體

送孝緒弟之臨安廣文任  
二首

雨中同閩人善持君汎舟雷峯諸勝  
一首

方菴詩贈心涵上人

登寶石山

四月十五日值先大夫中祥之辰禪院禮佛

勸述一章

詠懷詩

四十六首

游子歲晏冰雪載塗益粟行盡饑驅無所見

杜子于皇乞食詩惻然心傷爲賦反乞食

詩用淵明原韻

六首

中林堂夜集依曹秋岳明月之夜爲韻

四首

再過杜于皇饑鳳軒同用陶公飲酒韻

二首

韓聖秋庭中見霜菊用鮑明遠霜中能作花

爲韻

五首

和趙友沂錄別詩二首

社集中林堂同用謝康樂擬鄴中體分得賦

王仲宣韻送園次返邗江又韓返虎林

又同于皇賦用徐偉長韻

張瑤星招集松風閣用陶公飲酒韻

四首

偶集友人寓齋用陶公飲酒韻

黃石公招同趙洞門讌集齋中送趙友沂返

楚限韻

和洞門

和友沂

和石公

送杜于皇之金沙同顧與治唐祖命姚寒玉

集中林堂賦

三首

送周櫟園方伯北上用高義薄層雲五字爲

韻

五首

除夕過別于皇適伯紫先至同飲饑鳳軒用

淵明韻分賦三首

和陶公咏貧士

七首

清和一日過杜子昂寓值雨同言  
辭疆趙友  
沂顧與治紀伯紫黃心甫吳園次用王龍  
標宿陶大公館韻

留別黃石公用謝康樂南樓望所適客韻  
舟中留別姜如農仍用謝康樂韻

和答黃美中寄懷

定山堂詩集卷一

姪嘉穉

淮南龔鼎孳孝升著

男不稹全較

弟鼎穉孝積訂

士稚

五言古詩一

送雪堂夫子南歸用古詩十九首韻

良會成契濶執手當乖離出門卽河梁徘徊失津  
涯恩情中道捐會合已可知涼風有時令敢不辭  
華枝相送何用遠馬行何用緩倉卒共千秋崎嶇

定山堂詩集

獨身返生平管葛心盛年猶未晚努力作征夫迢迢夜中飯

其二

百草正搖落零露下衰柳蟋蟀傷故心蕭蕭保窮  
牖男兒金石交豈必在携手

頭婦相視各不言微軀敬自守

其三

歡至松與栢歡盡水與石廉頗免長平坐中無故  
客貴賤異哀樂人情以厚薄不見風塵子策足來

京洛一言取卿相貧交已離索蛾睂獨妍好春風  
羅華宅媒妁將安施萬里生咫尺恩怨亦繇人區  
區坐相迫

其四

培塿嬰百慮耿介成雷陳古來賢達士結交各有  
神侯羸與田光磊落誠近真豫讓斬衣祛國士報  
以申折劒躊爲鏡出入無纖塵半生不平心明明  
焰要津死當魂慨慷生當獨悲辛

其五

述知己也



少小事結束鬢髮如眉齊十五繡鴛鴦重簾覆庭  
堦軋軋理空杼芳年心苦悲一朝蒙顧盼光采驚  
鄰妻步搖與明珠行坐自徘徊命移顏色改觀者  
徒傷哀女感未嫁前士憐知己稀將心託黃鵠比  
翼還交飛

其六

嗛嗛思故鄉山中有瑤艸白日忽西馳何爲淹中  
道竹帛不可期憂來長浩浩歲月能愁人神仙豈  
難老

其七

秋蘭與薜蘿芳菲繚堂壁美人忽目成明眸殊的  
歷何期恩愛歇悲樂頓相易乘風駕雲旗縹緲將  
安適人生有別離所貴慎羽翮窈窕新相知睨笑  
紛接跡願隨鴻鵠逝肯受轅駒軌寸心本自知向  
人亦何益

其八

逃避亂也

晨風飄衣帶初日臨巖阿亂離二三子策杖披藤  
蘿當其合并時饑渴一以宜風波起中夜太息栖

三  
荒陂結手語汨羅絕命良已遲上有蒼浪天其下  
明月輝原野莽蕭蕭誰當憐桂菱傷哉失路人全  
生不易爲

其九

幽華被風日晡靄藏妍滋明逸絕世心要眇纏繁  
思團團合歡扇敝篋羅致之長跪告新人各有懽  
悴時

其十

鳴鳩妬百芳婉變怫衆女余情信潔修誰者能投

杼美人辭筦簟香澤盛如雨帝子攬袂嘆情親獨  
見許畫工重黃金氣結勿得語

其十一

伊呂誠有爲沮溺亦有道日月旣邁征壯心何草  
草時危失聖賢隱忍就衰老人生不得意常悔盛  
名早夫子崇令德多難以自考深山豺虎疑守身  
默爲寶

其十二

綿綿秋夜長窈窕夢不屬披衣視明月蕙草凋故

綠遊子工晨征意往反不速殷勤一杯酒徒侶何  
刺促所傷結交深中懷勞羈束

其十三

高樓結綺疏名姝皎如玉寶霍紛貴驕鳴鐘迭奏  
曲一朝甲第傾勢往情亦促悲風散瓊筵津塗成  
踟躕所以采薇士抗襟辭華屋

其十四

鳳凰翔丹霄狐狸嗥丘墓賢愚各易就何爲泣岐  
路所貴道義完寧嗟榮華幕君看達節士夙駕諧

獨寤亭亭百尺幹  
皚皚九秋露  
斯世無孔丘  
果哉敢疾固  
攬衣告僕夫  
河廣亦得履  
斯志寔必遂  
措足未云悞  
豈不懷栖栖  
黽勉保吾素

其十五

晨鴈翩南翔  
托言寄交親  
我廬已非舊  
何况典與墳  
徒步歸井間  
披裘以負薪  
貧賤亦何傷  
膠漆慙故人  
乃知蘇季子  
發憤非無因

其十六

去去祝復還  
不敢及離憂  
十步勿返顧  
母乃成遠

遊臨當分手時懊惜迫今茲請得爲路人庶無憐  
與嗤路人不可爲千載還相期

其十七

人言故鄉樂寧知故鄉悲遊子無室家淚落穿裳  
衣顧瞻雙老親顏色憐我違行行陟遙岑秋日揚  
清輝慈母衣線單早霜被征綏強食謝令名惟當  
遠遠歸世亂蛇虎多願各欽庭闈忍哉分羹徒割  
絕還翻飛父母心難言短髮聊可晞薄身忍棄捐  
語笑生柴扉

其十八

浮雲起北陸天地爲慄慄陰風何飄搖日月不成  
列龜山劇崢嶸惜我斧柯缺聊城一矢後千載無  
穿札雲漢鬱相望三歎謝離別寥廓亦何嘗延首  
浮雲滅回飈見太清留心待君察

其十九

烹鯉發素書清淚亦何綺嵒嶺萬事心寂寞今竟  
爾皎月良苦辛往往視襍被夢中見津夫長跪告  
維解何不迴中腸斷絕在於此



其二十

晨星射我床草蟲鳴我帷讀書消憂患孤心起徘徊  
千秋宛委藏已向名山歸大雅欣在茲草玄知  
者誰居當惜雨風行當惜裳衣

送遂初朱子南歸和蘇李錄別韻

出門萬里路歡愛爭須與游子欣故鄉將乖復躊躇  
山川鬱嵒堯中懷不可踰去者浮雲翔留者還  
向隅相視一太息顏鬢摧斯須當風告前綬慎子  
千秋疆

其二

青青園中桐皎皎森高秋鳳凰去千仞弋慕徒悠  
悠丈夫志寥廓貧賤理足酬結交遍津塗何能舒  
我愁請看杵臼人生死誠綢繆

其三

白露下庭莎涼風披拂之秋蟲含苦辛惻惻前致  
辭感子平生親臨當贈長思別離亦猶人所傷憊  
悴時歡娛悔倉卒此懷難等期

其四

定山堂詩集

五言古詩  
七

生別亦有數遠夢亦有因崎嶇逝與留同爲失路  
人塞馬鳴長風飄搖澤中身苟無霜積雁長夜何  
繇晨局促刀筆子相眎越與秦舊恩不可再涕泣  
徒鮮新公卿何颺忽輻輳稱上賓獨身辭榮華以  
告將來人但知織縑好不若織素親

其五

車輪似迴腸一曲一低徊風塵互瀕洞雙抱長相  
依念子如松柏何當遠乖離馬行忽返顧絃絕淒  
中懷豈不戀儔侶寸心良獨悲明月照流黃蟋蟀

聞吟哀銀河何的歷攬裳心魂摧芙蓉與芳蘭一  
一名當歸衣帶誠可托襟袖難可揮去去勿復道  
鴻鵠中天飛

其六

管鮑今不作人面如九疑僑札申久要乃在綰帶  
時明月照中庭酣樂知何其風雨一息來歡晏從  
此辭故人飽喪亂心迹同所期一日三見面枯槁  
爲華滋小別數作惡况當乖隔時風波各努力行  
矣寬憂思

其七

嘉樹忽零落蘭蕙失其芳清風吹我襟鳴鴈邁我  
堂平生金石交蹉跎成異鄉登高望車馬前路多  
雨霜昔爲比翼鳥相期共翱翔分飛何翩翩浮雲  
變四方采薇與種瓜志士亦有長但保咫尺心合  
并良未央紛紛燭火觀安知二曜光

花朝同敬哉輶退玉叔爾唯舒章界菴社集  
秋岳齋限韻十體

高岡鬱嵒堯梧子森成列一朝化荆杞鳳凰不能

食翩翩江海人來作燕趙客事往計多忤途窮步  
難擇飄零夙昔心迢迢向華月雜珮紛瑰瑜動搖  
春風發素珠在泥塗顛倒自差別但坐飲醇酒勿  
復談契濶爛熳揚馬輩豈供時世悅西京一以徂  
俯仰恣耿結

送孝緒弟之臨安廣文任

經亂無故鄉藏身無顯官祿微難逮養淚濕春盤  
寒騏驎騁絕坂鵬隼卑苟安庶待兵甲消寧旣纓  
珮歡道衰沉六籍世異輕儒冠白馬躍中衢金鐵

定山堂詩集

五言古詩  
九

卷一

交巘屹戟門朱粉多傭僧生羽翰皇天一傾否富  
貴紛股剝盜賊亦有名不顧人理殘閔彼繩樞子  
視褐嘗不完抱膝窮一經崎嶇斷晨餐朝愁楚騷  
嬰夕慨玄亭繁賴有臯比人聿振大雅觀登高發  
妙唱百草依芳蘭共寶冰雪姿蕭艾孰敢干頽流  
激大壑砥柱良獨難山深井邑荒尙聞蛇虎蟠達  
士貞萬變守身誠多端

其二

忽漫五日別轉悟三月聚萬里萍梗心十年榛棘

路甲申乙酉間鼎俎鬱經互璇籙裂河山朝簪謹  
黨錮骨肉頓分析門禍隨天步孝穆旣北留昭關  
亦南渡延頸企河清竄迹阻江戍鐵矢衝寒潮背  
決羣凶怒歌舞化灰塵斯謀良再誤所幸鯨鯢疎  
因致鵲鴒遇胥臺半春草西陵尙烟樹雪涕矯悽  
抱引歡發新寤鵬背方負天豹班猶隱霧青氈豈  
足托丹梯聊可赴煌煌先聖宮琴鐘守韶濩稽古  
志士榮大業起儒素及此動離筵征輶過春雨行  
矣乘雲風吾將老農圃



雨中同閨人善持君汎舟雷峯諸勝

輕渚揚素颿，桂棹沿悠緬。羣峭秀可掇，苔徑仄難踐。  
雷怒潭虬立，林暝沙鴻眩。曲嶼散餘柳，奇雲沒層巘。  
觸石碧乳開，動瀾蒼霧卷。雅尚忻偕集，塵累企初遣。  
叢祠荒鴟叫，零蔓紛披眼。佇視延悽愴，忽悟人代晚。  
巾香裊春木，閣火起廻坂。清暇庶有託，遊展自茲衍。

其二

道衰功業薄，淪跡寄漁釣。塗引步兵兵，慟景放孫公。

嘯丹壑媚遐粗晶日局繁耀言豁區中矚流覽烟  
際嶠縹藥春湍激翳蘿蒼崿峭紺碧森孤塔窈冥  
極橫眺殷濤盪遠樹霸氣斂殘曜嘆往覲川逝乘  
時詫電躍庶保伯鸞逸毋召鴟彝誚刷藥愜行歌  
傾樽耽埋照貧賤理足悅幽討歷衆妙繁陰豈滯  
阻霞客此同調

方菴詩贈心源上人

栖幽寡塵務冥覽恣所適屐放峯始晨鐘動日已  
夕澄淥交霽景紺宇流深赤一往領佳要雙寂愜

定山堂詩集

王官谷詩  
十一

卷一

心迹何意斗室間而有天海客遠廻陶謝駕妙叅  
支許席蘭橈浴靜夜松牖豁虛白酒禁時一開奇  
響振四壁世代慨晚暮山川成拘迫苟非卓朗士  
安保林壑癖龍戰紛遐阻鴻舉滯形役白法可逃  
世攬鏡復奚惜

登寶石山

捫蘿叩蒼扃雨磴積苔繡門射江潮濶湖帶錦屏  
右吳峯盡入抱越嶠遠來就雉堞炫表裏鱗甍吐  
層構杉栝俯若薺棠翳失橫岫鈴鐸旣風展金碧

亦綠周星崖延夕暉乳泉決春溜翠嶺此浮屠拔  
起六橋秀往者頗相忽凭檻若襟袖及茲足目到  
高深乃奇奏拭壁讀殘碑陵谷幾興仆滄海豈不  
廣詎信桑疇茂

四月十五日值先大夫中祥之辰禪院禮佛  
慟述一章

星紀歟二周驚怛若旦暮乞食辭丙舍十步九返  
顧不意青草原蒼茫墮烟霧金角一橫集豺虎竟  
高步華表虛鶴立遊雲邈鴻度揮淚望園域寸腸

宛回互龍象庶足賴箕尾夙已悟酪乳獲沾灑桂  
旗當紛驚倘鑒茅容心堅誓右軍墓竦息理難禁  
愀然立風露我情千載胸無乃發悽悽

詠懷詩

閒居無事託詠寫懷用阮公原韻得四十

六首

春岡芬瑤草皓月流素琴雲動諧麗矚練淨澄曲  
矜車馬何赫奕所思在中林長沮與石戶遺世良  
苦心

其二

神龍無定跡文禽恣遐翔繁英各斌媚寶此孤蘭  
芳山澤苟有托富貴理可忘薜茷裁我衣葵藿充  
我腸青霞開松牖丹竈森芝房濯纓萬里流晞髮  
千峰陽顧視塵中子戚促誠閔傷

其三

青門亦有瓜於陵亦有李榮華非金石安能保終  
始昔時王侯宅珠玉化榛杞狐貍穿丘墓云是層  
臺址歲盡歡不延誰爲羨門子飲酒悟達生身後

名可已

其四

彭殤盡一壑服食豈聞道崎嶇學神仙憂樂難自  
保容華若桃李努力就衰草何如東方生詠諧以  
終老割肉貽小妻能使顏色好

其五

白馬縱金羈皓齒揚清歌爲樂須及時盛年不再  
過愚子溺薰灼志士哀蹉跎一聞老驥言淚下如  
江河人生不適意歲月翻苦多秉燭以遨遊如此

永夜何

其六

天馬騁絕足乃在萬里外崑崙俯長河邈若一衣  
帶高視凌八極動與昭曠會曲十徇榮名更爲七  
尺害周身策已愚斯世亦何賴

其七

浮雲不可卽白日常西移生年飽憂戚行路徒逶  
迤黽勉終古心過時忽叅差方寸不自保後世誰  
見知迢遙雙黃鶴生世當別離



其八

登高一太息零淚沾裳衣  
流離逢世難遠道將焉依  
豈無脫粟飯中抱長苦饑  
孤蓬隨驚颺故林不可歸  
宛轉就娛樂安知心所悲  
迢迢天漢長嗷嗷鳴鴈飛  
禍亂幸衰息安枕以當歸

其九

蔓棘被中衢凝雲斷遙岑  
風塵一蕭條何者爲山林  
世短身苦長百憂積煩襟  
遠慕茹芝叟偃仰商山陰  
行歌自相和千載聞遺音  
黃虞不可作避地

難爲心

其十

擊筑動燕市鼓缶操秦音平生輕俠意與世同消  
沉立志苦不卒焉辨貞與淫起視武安第車騎紛  
如林彼姝雖憔悴誰當存其心

其十一

呂望起漁釣首陽臥荒林飛潛各有長修塗爭駸  
駸平世薇蕨安取餓無違心匹夫能鷹揚奮跡非  
滯淫鴻翮矯雲翔弱羽失拳尋遭時一差跌進退

定山堂詩集

卷一

難自禁

其十二

夙昔入宮時蛾眉傾昭陽承恩一顧盼行步搖華  
光何期中道捐華髮飄素霜殊麗旣難明含貞亦  
不芳玉鏡疑我姿秋風穿我裳時去顏色賤團扇  
徒廻翔平生一悅已灰沒何能忘

其十三

瑤草植孤秀蔦蘿被巖阿芳雜理自喻不怨無人  
過庭戶一移置剪伐何其多波瀾生倉卒信誓空

山河失志爲人役  
枯苑同傷嗟

其十四

丈夫鴻鵠志  
安能老房帷  
一往困飄蓬  
俯仰又以悲  
四海多路人  
游子知爲誰  
登高眺大荒  
隴樹同斜暉  
其間有故鄉  
紛紜不可歸

其十五

昔與故人別  
揮涕臨河梁  
仰視白日馳  
四顧心茫茫  
千載一相失  
黃鵠中天翔  
經歲無素書  
星漢遙相望  
空庭旅鴈鳴  
我懷如雨霜  
微陰盛殺氣  
君子

多憂傷展轉逢喪亂室家不可常飄搖萬里心載

咏蒹葭章

時聞上游之警因懷雪堂先生遂初朱子

其十六

沙中聚白骨云是長征者浮雲蔽天來何時無甲  
馬蒿藜盛城郭不辨非原野百慮悞倉卒隱忍金  
鐵下有身不自謀臨風淚交寫

其十七

我有一樽酒歎息爲誰傾故人紛宛雜所厚非沉  
冥失意不在衆睇眄爭枯榮慶卿與田光一諾輕

其生靈曜炯千載方寸同熒熒管鮑起貧交至死  
心長并黃金何時多含笑覩人情

其十八

荆山有奇璞秀孕天廟光剖之得國寶燦爛陳琬  
璜卞氏昔未遇掩曖愁孤芳別足豈云辱慟哭空  
山陽悼此連城姿蹉跎譽不翔物奇無知已不若  
棄道傍寄謝悠悠人失時誠足傷

其十九

星漢耿終夕桂鏗方向冥微曦隱東巘宿鳥翩晨

征經亂無安眠休聞行子聲側耳交然疑饑鼠空  
梁鳴艱難不自料萬里生閨庭

其二十

元精相代禪嘉候當青陽天地氣以盛蔚爲四序  
綱珍卉被廣野輕雲秀葑房草木各自壽百歲無  
繁霜焉知義馭迫無藥停景光迢迢園中絮隨風  
已飛翔

其二十一

少壯不自力時至心常驚乘暇開廣筵桂醕日夕

傾新響發朱戶狎客羅前庭臨觴忽垂涕自傷非  
人情薄軀無足錄姑以荒晏鳴信陵耽酒婦敢曰  
謀長生

其二十二

晨風西北來四座經哀傷我友奄凋喪廣柳長河  
旁三歲字未滅契濶成滄桑鬱鬱金石心摧爲地  
下霜多憂不自遣壽命胡由長

悼舒章也

其二十三

魯叟慨逝川齊景泣牛山古來賢達士殂化何翩



翻千秋與萬歲相望徒淒然平生歌舞人白楊蔽  
便娟萬事不可知哀樂何相連

其二十四

皎皎織素女迢迢立銀河纖手耀玉雪文錦爛天  
葩桂車紛翠羽鵲渚搖瓊華終古一歡宴靈匹世  
所誇綢繆未云極良夜以蹉跎星盡東方高盈盈  
奈樂何

其二十五

貞松峙層崖杜若森芳洲孤者易表妍百草爭與

雛孔翠有毛羽羅網紛相求  
麟鳳亦畏人郊藪無常遊  
悼彼宣聖言乘桴乃遠浮  
靈均秉奇操涕歎盈中洲  
滔滔靡所托委身任洪流行  
步一顛躓砥道無安輟平生  
超世心戚戚徒離憂

其二十六

許由遺世務抗迹箕山巔  
堯禹不惜身聚族謀滔天  
星岳雖就序脛股已可憐  
何如保昏默強食兼晏眠  
悠悠以終老放意羲皇年

其二十七

奔壑東西流浮雲日夜行一身不自知奚爲驚榮  
名蘇季佩六印兄嫂移其情猗頓競刀錐積貲馳  
豪聲奄忽勢力盡白日以夕冥縱橫致車裂金穴  
摧堅城走險徇世態徒爲觀者榮快意萬事伏成  
敗無岐形逍遙却營慮喪失焉從生

其二十八

差昔戰勝高築姑胥臺鼓鐘奉美人麋鹿何慮  
哉一夕下騶馱碧血殷草萊宰嚭甘言入越甲橫  
江來佞夫實寇讎豈待飛塵埃至今怨館娃佳麗

徒心灰

其二十九

伍胥爲楚纍冤憤橫陰幽壯志懼不申一瞑成千秋  
潛身自乞食行路心悠悠女子感大義投軀清  
瀨流誓師還滅郢宮闕荒烟浮寢室亦已甚塚墓  
况不留得志恩怨塲下從龍比遊陶朱一寒心遂  
理鳴犢舟

其三十

范睢垂死人卿相盛一朝勤劬吃公子孤憤耿不

消人生無智愚榮困隨所招著書以窮年焉得資  
用饒不見金張家咳唾如珠飄謀身亦多術何用  
耽枯焦

其三十一

朝懷常至暮夕慮竟達晨躊躇成坐困一往如荒  
淪未知心所爲強顏還向人平生骯髒懷今日工  
悲辛被褐抱珠玉孰辨僞與真得歡聊自愚歌泣  
非兩身頗聞田寶里薤露驚四隣

其三十二

男兒不得意衣食徒迴遑慷慨行出門大佑趨咸  
陽千金恣結束人馬同輝光作使輕薄兒談笑芬  
都梁一擲傾百萬醉臥朱樓傍明璫間寶瑟五陵  
花正芳今日樂相樂平地能翱翔

其三十三

玉杵有靈藥持以奉長生青鳥下來視玉女紛奇  
形璫沙不可卽龍馭忽已冥至今茂陵道秋草傷  
人情

其三十四

定山堂詩集

五言古詩

卷一

迴策踰羊腸挂席抵驚瀨人理不可期得全亦意外大辱吾有身矧乃嬰輦帶豈如灌園子與世邈無賴竭蹶慕盛名事往轉爲害莊老練世務寂寞以自大

其三十五

魯連守布衣高視下八荒一爲辭賞言意氣炯不忘蘭生抱壁還志抗日月光睨柱亦已危至今生氣揚遭時譽俱成英擅千夫場措足忽顛蹶翻懼姓氏彰立名固有命志士獲其常

其三十六

白榆何歷歷繁星燦珠璣景霄敞蘭宮驟虬躡素  
暉顧視六合間城闕紛已微雲網旋八極晨露曾  
未晞蹢躅一下來自言丁令威衢巷鬱參差人民  
與我違仰身玄圃端雪涕瑤池湄學仙亦愁人閱  
世傷凌彝

其三十七

韓彭未薤醢嶸然稱世雄徒步佐龍奮天業標熙  
隆赫赫帶礪盟一夕春冰融時勢不可極盛滿異



處冲失意灌仲孺杯酒乃興戎貧賤而肆志禍亦  
伴豐崇功名與意氣兩莫保令終鑿坏謝世人邈  
迹良可風

其三十八

魑魅諧險夫歎然共四裔孔雀畏牛觸渴飲翮焉  
逝文采伏患媒贈繳羅雲際豫章有良材生爲匠  
石制頑鄙如可學決絕以自誓

其三十九

名姝傾南國佳人出北方迴風一流盼雲彩橫蘭

堂失身在奄忽榮艷成感傷毛嬙及鄭旦顛倒讎  
榮光寄謝輕薄子物理詎有常

其四十

水覆不再收落花無重榮昔有杞梁妻一哭崩人  
城骨肉化爲土終古不欲生死亦復何樂強生非  
其情人壽苟難忍拙矣需河清

其四十一

洞庭張鈞天冀階奏咸池魯門一鐘鼓爰居駭非  
宜大鵬負青雲弱鳥安卑枝但免充盎礫敢希決

藩籬智愚亦自曉何用相規隨

其四十二

宋玉工憔悴當風一披襟長卿佻達人抗聲賦上  
林楚宮疑微辭蜀女傾琴心好色古良難文墨無  
相尋

其四十三

層陰天北來迢遙見停雲游子一身多不暇傷離  
羣言采北山桂庶慰心糾紛

爲京國諸知己也

其四十四

一月兩素書我友長相思上言故鄉亂下言何所  
之長跪一揮涕金石難等期萬國盛征戰無策相  
諧嬉欲語不敢長此非加餐時

時秋岳書至

### 其四十五

李廣殺醉尉褊狹誠非宜要亦英雄人快舉非逆  
施傷心今故言蹋翼奮澠池徒失貴臣意七尺成  
崩離氣激豈不豪乃爲人奴隸

### 其四十六

絕域起浮雲云自隴西里東隅事旣失安能救西

汜管敢憤莫雪刀鏃期難俟公卿盡文墨門戶紛  
荆杞天壤有史遷動色不能已竟忍蠶室辱國士  
相申理萬古一交情朋友觀以止

游子歲晏冰雪載塗盎粟行盡饑驅無所見  
杜子于皇乞食詩惻然心傷爲賦反乞食  
詩用淵明原韻

蹇余賦性拙亂離復中之艱難一身完忍與貧賤  
辭所至常壁立食客叅差來家人脫簪珥佐余行  
酒杯薰然共一醉還歸咏我詩斯謀獲長遂吾竟

多吾才行行謝故人五斗安足貽

其二

弱齡辟州府策足騁所之寄食在一官遂與田里  
辭故園旣蕪沒倉皇賦歸來食指以繁多况乃耽  
啗杯廉吏不可爲感彼負薪詩鄙人烏能廉愧乏  
聚斂才干祿不自力而望他人貽

其三

我友在遠道褰裳往從之顏色忽非故賤子前致  
辭迢遙命巾車端然爲子來潛身行乞食非徒舉

君杯其人笑且怒誰令工聲詩不見京雒間輻輳  
皆雄才金粟如丘陵白晝喧相貽

其四

西山有餓士到今民稱之原思一小官與粟能抗  
辭口腹豈自讎良以戒倘來安得皆廉泉爲余分  
此杯曳杖行和歌爰賦采薇詩斯人不可見傭販  
何多才責望非人情吾誰與惠貽

其五

貧賤豈不貴恨吾離去之失身志肥甘溫飽復我

辭枯腴頗自取人誰知懷來違性甚饑寒萬鍾等  
一杯秉耒無良田虛詠幽風詩躬耕尙不易旅食  
焉能才庶免苟得請請辭長者貽

其六

故人有高義見余哀憐之曰救溝壑辱慷慨復不  
辭斯言未脫口坎壈紛然來余亦沾病困行藥時  
盈杯素餐良非福惕矣伐檀詩乃知藜藿人不飽  
非無才得喪有定命敢怨蒼天貽

中林堂夜集依曹秋岳明月之夜爲韻



時序驚代謝蜻蛚淒繁聲愴愴前林霜續我蘭膏  
明好友送中夕相敘平生情巖壑理旣乖竹帛終  
何成時危寡安居山嶽當戶庭携手悲故丘汎汎  
池中萍人生有美酒何若身後名不見朝曦暉向  
夕亦以傾

其二

歲事日衰徂萬感積華髮蒼蒼禾黍間皎皎上明  
月浮雲空掩靄美人做瑤闕瓊卮寒共御漏盡歡  
不歇世亂貧賤安固窮謝請謁碧沼流清漪荒山

長秋蕨溷俗懼乖素降辱轉多蹶君子相閱傷蓬蒿令身沒

其三

游子悽歲晏戚戚心難知悲風起廣術羽翼垂有時牽衣戀縞帶綢繆盡中私嘯歌日以遠雨雪將告誰時去文彩賤阿閭巢荒鴟揮涕勿復道有酒斟酌之耦耕諧鄙尙埋照息衆嗤盈盈庭中月幽琴爲君施

其四

大江朝暮流夕陽終古下  
累累墟墓人何年美臺  
榭吳宮芳蔓深金盤  
泫中夜田實各自豪  
毛羽生權藉驚飈撼  
庭柯候至委凋謝  
昔時繡幕賓勢去  
怨交借歎世競拊  
掌爲歡寓悲咤  
對酒且當歌冥  
心任元化

再過杜于皇饑鳳軒同用陶公飲酒韻

窮巷落木深中有幽人宅  
昔來雙桐青乍到鴻鴈  
跡及茲對杯酒爲日忽已  
百歲晏多寒雲庭草委  
衰白苟無達生術晚暮復奚惜

其二

絕交旣不可歎世怵人境爛熳劉伯倫閉關終日  
醒運會一徂謝多憂戒獨領孤衷栖竹素微言息  
鋒穎古之深心人幾先亦以炳

韓聖秋庭中見霜菊用鮑明遠霜中能作花  
爲韻

寒潭扃幽戶竹樹森成行蕭然九秋姿重蘆君子  
堂上有林中月下有地上霜

其二

笑山堂詩集

卷八

羣卉淒已歇獨立當嚴風匪無過時傷所得在固窮歲寒失知音埋沒蔓艸中

其三

秉燭照疎放傲岸恒自矜違世媚幽獨吾以欣吾朋皓首大澤間其愚安可能

其四

物候旦夕殊寒梅開已落皚皚清露心含芳振巖壑草木有懦頑聞風庶能作

其五

柴桑去我遠處士歸無家愛此晚暮情冰雪靜不  
譁君見松與柏信憐桃李花

和趙友沂錄別詩

揚舲憶春渚芳醕愁孤斟爛熳醉中別白眼低橫  
參寂寥烟草路數枉瑤華音涕唾在襟袖緘怨千  
峰深皎皎庭中月不雨恒淒陰炎曦忽以徂蟋蟀  
鳴至今盈盈建業水飲啄仍相尋嘉會不可常聚  
散難爲心

其二

歡讌忘歲時流光駛難駐商飈轉林藪青山忽非  
故霜重鳬鴈下木落樓臺吐濁酒敝離亭寒星墜  
如雨末俗無莊言達人恣高步一聞白苧歌心死  
前谿渡失志媚朱顏甘爲悅已悞靈脩自嬋媛天  
遠不可訴嵒嶺九秋心風波慎前路

社集中林堂同用謝康樂擬鄴中體分得賦

王仲宣韻送園次返邗江又韓迓虎林

秋冬氣慘慄客懷日震蕩山川悽新感宮闕頽遺  
像是時朔鴈多寒星帶郊壤我友二三人古懼互

推獎燈火清百慮亭臯愜偕往朝饑儔侶密暮雨  
蓬蒿長蕭然木榻間乾坤一排盪前綬發江介別  
夢已難朗道危迹易困憂積中不賞太息河梁言  
愁雲吹五兩黃鵠羽翼垂霄漢頓高廣嚴城有鳴  
角蟋蟀亂餘響落葉去不留枯枝託誰養

又同于皇賦用徐偉長韻

秉燭夜何其虛堂動瑤瑟美人怨將離促坐恐不  
密前林布繁陰星躔兆箕畢吹霞入庭戶未往中  
慄慄道路各東西行子情互質蒼茫江海心眴勉



就蓬室嚴冬短已半寒月遠仍一對酒且當歌苦  
多念去日鴛鴦在中渚雙雙戀儔匹送子以四愁  
惆悵旋自失

張瑤星招集松風閣用陶公飲酒韻

黃虞旣云沒處俗乖我情君子秉幽尚遯世無徇  
名空山有濁醪聊以遣吾生夕陽已復下歲晚心  
恒驚不見高蹈士一往名竟成

其二

貞松不塵處高雲無羣飛鑿坯類慢世安知心所

悲葉落戀故柯中林猶可依萬動息初夜獨鳥知  
還歸百年能幾何所恨不早衰沉飲非養生庶于  
意不違

其三

志士愛溝壑處死誠有道赫赫壯毅公

瑤星尊人  
殉東萊難

生非牖下老遺烈焰後昆天地不能槁時會既代  
謝令名獲完好全身事杯杓不辱以爲寶河海有  
素源卓犖冠人表

其四

定山堂詩集

卷一

一

清晨聞叩門客自遠方至

謂祖命也

相期過林莽醺然

同一醉攬鬢歡昔顏意滿語無次生世多別離縞紵心足貴磬折車馬人焉知飲中味

偶集友人寓齋用陶公飲酒韻

柴車經廣陌衡宇欣然開貧窶非無營對酒寬中懷江河逝不居日月與我乖接興慨已而魯叟耽栖栖不見前夕中骭沒濁水泥故山有好鳥毛羽歡初諧爲樂一以晚秉燭亮不違相勸盡一斗吾意爲君回

黃石公招同趙洞門讌集齋中送趙友沂返

楚限韻

滄海日夕流幽人寡崖谷晨風羨歸翼送子北山  
麓龐公家室完脫屣踰梅福樂饑以卒歲豈必饒  
旨蓄楚之傷心人靈均好奇服獨醒觀衆醉糟醕  
任百斛蕭條萬里身布帆纔盈幅河水凍鳬鴈戍  
壘游麋鹿故人一尊酒行行且信宿刷苓遠可偕  
采葛愁難讀豈以參與商而忘昔比日期子以重  
來吾仍老蓬屋

是時予  
將北征

定山堂詩集

五言古詩

卷一

和洞門

霜鴻下石城爲期匪云久目送晚江湖離觴未停  
手居人掩空巷萬愁無不有中林早梅發野香動  
戶牖輕帆天際來叩門訝親舊情至無寒溫深燈  
續卮酒爛熳清漏徂簷虛墮星斗世事難重陳但  
飲一開口三唱驪駒曲天風颯衰柳坤軸奠四維  
先賴存交友千載一河梁古道誠無偶予亦滯行  
役飄零速老朽願言崇令名善藏以自壽

和友沂

義馭迫隆陰漏永何由旦朱紱自橫陳一彈再三  
嘆兼葭白中渚寒水平若案殘堠懷晚泊斜鴈極  
晨看吳草短已歇楚峰遠仍亂江海一扁舟醉餘  
頓恒岸武昌有鯉魚雙雙長尺半停雲靄南紀顏  
色如褰幔君知故人心不同風雨散烏栖楊柳日  
回頭憶三喚盡收兒女情百尺峙孤幹酒色藏賢  
豪危世亦波瀾不見輕薄兒裘馬賤柔翰

和石公

長沙才子地磊砢復奇節一睹希世姿燦如鄴中

珙六翮邈雲漢萬里響金鐵君子多憂患愚者愛  
磬折已堅于木尙未闕子羽舌袖中多素書往往  
字不滅冥鴻亦有曹相戒羅網設玉衡指隆冬道  
阻傷雨雪離別令人老衣帶緩重結商顏一芝草  
遠駕赤松傑子有高堂親倚閭偕康悅浮雲佇合  
并日月無停轍相勸獨加餐意滿詞轉拙

送杜于皇之金沙同顧與治唐祖命姚寒玉

集中林堂賦

久客送征綬愁思如烟草欲別難爲顏三歎令人

老時俗溺輕肥貧賤無一好貞士秉奇尚絕物事  
幽討蛾睂信潔修名毀亦已早達生類沉冥畏世  
學枯槁荆山有神璞泣者重其寶勗哉愛景光明  
德庶可澡

其二

夜永燈燭微寒星下空屋我友蓬蒿栖塗窮轉馳  
逐分袂疑前期欲語難更僕霜勁萬木墜潮平一  
江東中夕起悲歌哀鴈相斷續平生磊砢意嶽嶽  
折五鹿衰鳳歎已而鸛羅在林麓歲晏多疾風北



門不可讀徒步涉遠道江介衆峰矗芳杜隔中洲  
資施邈難服何以喻渴饑當曠思霖霖

其三

相逢長安道携手登高樓是時歡笑多對酒不能  
愁奄忽桑海移金戈響颼颼得歸頭欲白重見涕  
未收羣居恒戚顏况乃遠行遊不怨別離長所傷  
生計適餅中米適盡無策令子留霜雪迫征驂汝  
我情相猶驚林無定巢急瀨無安舟因風企羽翰  
惠我藏山謀

送周樂園方伯北上用高義薄層雲五字爲

韻

信陵結客後千載無人豪壯夫意氣盡往往因錢  
刀余實羈旅人出門欣所遭公瑾邈難儔入座傾  
醇醪相尙在襟期餘事敦綈袍清風拂朱絃金石  
與我操滔滔廣陵水中夜爲波濤俯視白日輝仰  
視滄浪高

其二

柳色滿邦江河橋動清吹颺歌一尊酒墮盡蒼生

淚濟世重元元古賢有深智蕭然冰雪裝雲嶠恣  
遐寄閩海化耕桑川巖互相媚萬里京華行圖書  
綴征轡白門梅始花相見如夢寐夜半草堂開青  
燈焰奇字三歲故人心歡多語難闕皎皎庭中月  
爲公燭明義

其三

是夕霜中禽棲我池上閣鴛鴦戀匹儔胡爲怨離  
索古之鍾情人綢繆各有托一奏迴腸曲再理湘  
君約楚水寒不流吳烟黯如昨殷勤懷袖間當風

出香澤耿耿視明河參辰永相錯離別安可爲對  
酒且娛樂林霞已交飛晨風散黃鶴贈子以將離  
目成意不薄

其四

矯矯青驄馬司隸何風稜嶽嶽龍門高厨俊推先  
登歲月旣遷流多難連滂膺百折天所遺玉琴耿  
朱繩至今江海上冽若萬壑冰君子崇令德所患  
非繳贈當時炙手人時去誰見稱黽勉霜雪姿孤  
柯峙巖層

其五

故人紛京雒山澤非所羣  
賤子眇微尚貧窶亦自欣  
甕牖忍朝饑高吟至夕曛  
北山有叢桂其罪誠常焚  
四海一知己進食意已勤  
惠風揚幽蘭綰帶芳相聞  
嘉會不可常別袂從此分  
百里有素書千里有浮雲

除夕過別于皇適伯紫先至同飲饑鳳軒用淵明韻分賦

入戶逢幽人如雲下遙嶺長慨歲已邁清歡戀餘

景遊子中難宣四顧積淒冷置身尊酒間白日爲  
我永蕭蕭庭際樹三見寒鴻影余三飲軒中矣盤餐頓忘  
味快意無不騁擾擾塵市營愧此巖扉靜

其二

逆旅不可處北門復見迫召薨古城下大道連廣  
陌揚子一蓬蒿千載識玄白所傷非容膝畏路何  
其窄于皇時欲移居城南殷勤卜南鄰傲我遠遊客庶堅叢  
桂約預理塙東宅

其三

懷憂非一緒長貧令人老豈無金石心歡笑各難  
保二毛愁中繁尙憶髮始燥日月恒苦晚別離恒  
苦早清醑方未輟瑤瑟仍在抱惜別不盈觴何用  
傷遠道

和陶公咏貧士

百爲拙羈旅貧賤恒相依中夜歎息長欲起愁晨  
暉風林旣淅瀝嚴霰方交飛托身天地間四顧無  
所歸辛苦具脫粟對食翻忘饑我友多簞瓢固窮  
安足悲

其二

所居在山巷白日迴高軒世士與我乖屏迹於陵  
園層陰速短晷夕景悽寒烟謀慮知不臧罔罔空  
單研失意事非一自愚仍好言安此已若命戚戚  
者非賢

其三

繩床積素書斗室橫鳴琴有婦甘質春五噫諧賞  
音所尙在嘉遯榮利寧足尋貧家寡濁膠有觴卽  
對澍良無北門謫拓落還相欽屢空計誠非歲寒



欣此心

其四

貪夫徇苟得有目慙離婁所營在睂睫利動禍已  
酬不見荷頓家爲謀亦云周刺促雖刀中與我等  
同憂銅山化北邙獨往無匹儔固哉甕牖人于世  
終無求

其五

西山有餓夫一飽不遑干柳下遂不恭退然怡小  
官俗衰道力微饑者良易餐志士愛溝壑豈復爭

暄寒一息錢刀虛儕偶收其顏吁嗟憤世士委才  
從抱關

其六

寄心百年內搖落如秋蓬義軒不可作擇術奚能  
工飲啄送微軀家風慙兩龔顧視龔斷夫意復恥  
苟同鄙拙誠足嗤吾亦怪其通執鞭悔已晚所好  
庶獲從

其七

孤鶴唳廣野逸翮橫九州本無稻粱性鷄鶩安足

儔壯夫一摧顏歲月逝若流贈證四海心而爲衣食憂哀憐韓王孫一飯千金酬意氣良能爲富厚不可修

清和一日過杜于皇寓值雨同冒辟疆趙友沂顧與治紀伯紫黃心甫吳園次用王龍標宿陶大公館韻

遙栖屏世營閉門各有務客衣寒乍深春陰轉非故蕭蕭塵海間見此梧竹路斗室已寂寥嗜幽駭羣鷺微雨一斷續灑然若晨露江燕巢旣葺楚鳳

饑仍屢古道望今人斯誤不堪顧几上橫素琴庭  
中雜芳樹且偕鳳所歡高吟送日暮墻頭過餅餌  
纖手停纖素虛窓燈火青蒼蒼破林霧同爲遊子  
顏別多改新晤僧歸芒屨濕翻訝苔蘚步如何遠  
公社攢睂亦成趣恒慮俗士覺閒居來弋慕鐘梵  
起清音檐花落無數

留別黃石公用謝康樂南樓望所遲客韻

征馬鳴廣路行子役已迫臨發野躊躇戀我北山  
客歡讌方及晨情話輒連夕斗酒雖細傾中懷浩

幽適

石公不善飲

大義重然諾窮交等愉戚入雒悵遠

遊同心况離隔蕙纓結難忘續紛芳可摘美人乍

綿邈山川何蕩析微尚企歸休清塵佇恒覩

舟中留別姜如農仍用謝康樂韻

乍見卽臨岐爲歡亦已迢迢經歲心持向萬里

客早衰各問年十載如一夕往事積淒歎對酒反

不適當時痛飲人綢繆踰親戚存者已晨漢况乃

河山隔

爲魚山孟符諸子也

吳江春草繁愁遠不可摘俗薄

防面難相煩爲剖析古道照別顏行行覲重覲

和答黃美中寄懷

陵谷一推移吾生竟衰賤飛蓬感容鬢小草含霜  
霰裴徊京雒間寧爲纓組戀我友管樂儔英眸炯  
巖電枉矢伏璇宮燭幾誰能先一出決龍卧十年  
卑豹見蒼蒼四海姿艱難成獨善靈均蘊蘭蕙肯  
爲蕢棗變至今長信月流螢泣團扇豈無雙秦璫  
明珠冀誰盼昨夜楚江書檐花落未徧殷勤故人  
心路岐吾敢眩北山悔已晚况乃長卿倦上下千  
百年茫如未開卷鼎食與鼎烹其間不能寸斯人

定山堂詩集

卷一

或陷溺吾黨猶狂狷三復誦停雲悠然柴桑面